

Cyfarfod	Fforwm Cyllideb Ysgolion
Dyddiad	7 Chwefror 2022
Teitl	Rôl a Chyfansoddiad y Fforwm
Awdur	Siôn Huws – Rheolwr Priodoldeb ac Etholiadau
Pwrpas	Cyflwyno er gwybodaeth

Cefndir

1. Yn 2003 daeth yn ofynnol i bob awdurdod lleol yng Nghymru sefydlu fforwm cyllid ysgolion, yn unol â gofynion Rheoliadau Fforymau Ysgolion (Cymru) 2003.

2. Cyhoeddodd Llywodraeth Cymru Ganllawiau ar gyfer sefydlu'r fforymau yn 2003 (*'Canllawiau ynghylch sefydlu Fforymau Ysgolion yng Nghymru'*). Yn 2011, yn dilyn adolygiad annibynnol o effeithiolrwydd fforymau ysgolion yng Nghymru, cyhoeddwyd *'Canllawiau Arferion Gorau ar gyfer Fforymau Ysgolion yng Nghymru'* (copi wedi ei atodi).

Aelodaeth y Fforwm

3. Mae'r rheoliadau yn darparu bod rhaid cael o leiaf 15 aelod. Rhennir yr aelodaeth i ddau categori:

(1) Rhaid i'r awdurdod benodi *'aelodau o'r ysgol'*, h.y. aelodau wedi eu hethol i gynrychioli cyrff llywodraethu neu benaethiaid yr ysgolion a gynhelir gan yr awdurdod. Rhaid i'r awdurdod wneud trefniadau i sicrhau bod aelodau'r ysgol yn cynrychioli ysgolion cynradd ac ysgolion uwchradd yn gymesur a bod pob categori o ysgol o fewn yr awdurdod yn cael ei gynrychioli. Rhaid i'r awdurdod geisio sicrhau hefyd, i'r graddau y mae hynny'n ymarferol, fod o leiaf un aelod o'r ysgol yn rhiant-lywodraethwr.

(2) Gall yr awdurdod hefyd benderfynu penodi *'aelodau o'r tu allan i'r ysgolion'*. Ni all mwy na 25% o aelodau'r fforwm fod yn bobl nad ydynt yn aelodau o'r ysgol, ac mae hyn yn cynnwys cynrychiolwyr o'r awdurdod ei hun, petai'r awdurdod yn benderfynu cael cynrychiolwyr ar y fforwm.

4. Wrth benodi aelodau o'r tu allan i'r ysgolion rhaid i'r awdurdod, os yw o'r farn y byddai'n briodol, ofyn am enwebiadau —

(a) gan Fwrdd Addysg Esgobaethol unrhyw esgobaeth yr Eglwys yng Nghymru y mae unrhyw ran ohoni yn ardal yr awdurdod perthnasol;

(b) gan esgob unrhyw esgobaeth yr Eglwys Gatholig Rufeinig y mae unrhyw ran ohoni yn ardal yr awdurdod perthnasol; ac

(c) gan undebau athrawon ac undebau llafur eraill y mae ganddynt aelodau sy'n gweithio yng Nghymru.

5. Mae darpariaethau hefyd i ganiatáu'r awdurdod wahodd cyrff penodol i enwebu person i fynychu'r cyfarfodydd fel arsylwyr.

Aelodaeth Fforwm Cyllideb Ysgolion Cyngor Gwynedd

6. Wrth sefydlu'r Fforwm yn 2003 penderfynodd Bwrdd Cyngor Gwynedd ar yr aelodaeth ganlynol:

Aelodau Ysgol

- 6 Llywodraethwr (2 o bob ardal) wedi eu henwebu gan y Ffederasiwn Llywodraethwyr
- 4 Pennaeth Uwchradd, i'w dewis gan y Grŵp Strategol Uwchradd.
- 6 Pennaeth Cynradd, - 2 i gynrychioli pob rhanbarth ac i'w dewis gan y Grŵp Ymgynghorol Cynradd.
- 1 Pennaeth yn cynrychioli ysgolion arbennig
- 1 Pennaeth yn cynrychioli ysgolion gwirfoddol.

Aelodau Eraill

- 1 aelod yn cynrychioli'r Fforwm Undebau.
- 1 aelod yn cynrychioli'r Esgobaethau.
- Deilydd Portffolio Addysg ar Fwrdd y Cyngor.
- Deilydd Portffolio Cyllid ar Fwrdd y Cyngor.
- Cyfarwyddwr Strategol Datblygu
- Cyfarwyddwr Strategol Adnoddau

(Dylid nodi nad yw swyddi'r Cyfarwyddwyr Strategol bellach yn bodoli.)

Swyddogaeth y Fforwm

7. O dan y Rheoliadau, mae'n rhaid i awdurdod lleol ymgynghori â'r Fforwm ar y canlynol:

- Yn flynyddol ynghylch ei swyddogaethau mewn perthynas â'r gyllideb ysgolion a newidiadau i'w gynlluniau ariannol. Gall awdurdod hefyd ymgynghori â'r fforwm ar unrhyw faterion sy'n gysylltiedig ag ariannu ysgolion, fel y gwêl yn dda.
- Mewn perthynas â newidiadau i'r fformiwla cyllido ysgolion.
- Mewn perthynas â chontractau ar gyfer cyflenwadau a gwasanaethau sy'n mynd tu hwnt i drothwy penodedig

8. Yn deillio o'r rôl ymgynghorol uchod mae gofyn i fforymau cyllid ysgolion hefyd adrodd i gyrrff llywodraethu'r ysgolion a gynhelir gan yr awdurdod ar ganlyniadau unrhyw ymgynghori a fu.

Cyfarfodydd

9. Rhaid i awdurdodau lleol benderfynu pa mor aml y cynhelir y cyfarfodydd a'u hamseriad er mwyn hyrwyddo busnes fforymau ysgolion.

10. Mae Llywodraeth Cynulliad Cymru wedi argymhell y dylai fforymau ysgolion gyfarfod o leiaf bob tymor ac y dylid trefnu cyfarfodydd mwy rheolaidd i drafod unrhyw faterion o bwys a fydd yn codi. Byddai o fudd i gyfarfodydd o'r fforwm ddilyn cylch ariannol yr awdurdod lleol fel y gall y fforymau ysgolion gyfrannu at y broses o wneud penderfyniadau ar yr adegau priodol.